



**Äntwert vum Premierminister, vun der Ministesch fir Gesondheet a sozial Sécherheet a vum Kulturminister op d'parlamentarech Fro n°3963 vun der honorabeler Deputéierter Alexandra Schoos.**

**1. Wéi begrënnt d'Regierung d'Decisioun, op eng allgemeng, interministeriell Reegelung fir déi schrëftlech Kommunikatioun mat de Bierger ze verzichten?**

De Kulturministère schafft intensiv um Aktiounsplang fir d'Lëtzebuenger Sprooch. An engem vun deem sengen dräi grouse Kapitele geet et ëm d'Visibilitéit vun eiser Sprooch. Hautdesdaags ass d'Visibilitéit am virtuelle Raum besonnesch wichteg. Dofir schafft den Zenter fir d'Lëtzebuenger Sprooch, zesumme mam Service information et presse, intensiv un engem Guide fir d'administratiivt Schreiwen mat entsprechem Glossär. Dëst Wëssen a Kënnen soll dann och iwwer d'Weiderbildung un d'staatlech Agente virugi ginn, wat de Verwaltunge wäert erlaben, sech konsequent op Lëtzebuergesch un d'Biergerinnen an d'Bierger ze riichten.

Fir de Groussdeel vun der Kommunikatioun vun der Regierung an de Ministère gëllt dat aktuell schonn. Um Site [regierung.lu](http://regierung.lu) kritt een d'Informatiounen op Lëtzebuergesch.

De Virrang beim Kulturministère senge Beméiungen hunn aktuell d'Gemengen, well si mat hire Matdeelungen am nooste bei de Leit sinn. Och dierf een den didakteschen Notze vu Gemengesäiten op Lëtzebuergesch net aus den Ae verléieren: Hei kënnen d'Leit, déi am gaange sinn eis Sprooch ze léieren, am konkrete Kontext Informatiounen zu hirem Alldag op Lëtzebuergesch liesen, an de Fall gesat, nach eemol an enger anerer Sprooch iwwerpräiwen. An den nächste Méint kréien d'Gemengeverwaltungen déi sproochlech, administrativ Geschierkëscht, fir hier Internetpresenz unzepassen.

Duerno ass et och méiglech, dee selwechten Exercice fir d'staatlech Verwaltungen ze maachen.

**2. Kann d'Regierung eng Tabell presentéieren, déi regruppéiert a begrënnt firwat wat fir ee Ministère a wéi eng entsprechem Verwaltungen an ëffentlech Institutiounen, wéi eng automatiséiert Bréiwer a wéi enge Sprooche verschécken?**

Well esou eng Bestandsopnam net besteet, well keng Elementer dovunner am Virfeld gefrot a gesammelt goufen, an d'Regierung eng allgemeng Uwendung vun der Lëtzebuenger Sprooch upeilt, ass d'Opstelle vun esou enger Tabell déi no hanne kuckt, net geplangt.

**3. D'Sproochegesetz vun 1984 gesäit vir, datt de Bierger d'Wiel huet an enger vun eisen dräi administrative Sprooche mam Staat ze kommunizéieren. Wier et an deem Sënn net méi effizient, standardiséiert Bréiwer grondsätzlech a systematesch an deenen dräi Sproochen ze verschécken?**

Den Artikel 4 vum 1984er Sproochegesetz gesäit vir, datt d'Verwaltung sproochlech reagiert, andeems se an hirer Äntwert déi Sprooch benotzt, an där de Bierger seng Ufro gestallt huet, esou wäit et sech ëm Lëtzebuergesch, Franséisch oder Däitsch handelt. D'Tatsaach, datt d'Regierung konsequent d'Offer vum Lëtzebuergesch op hiren Internetsäiten ausbaut, ënnersträicht de Wëllen, a béid Richtungen aktiv an eiser Sprooch ze kommunizéieren.



- 4. De Recours op déi portugisesch Sprooch an der Kommunikatioun vum Gesondheitsministère gouf mat der Erreechbarkeet vun enger méiglechst héijer Zuel vu Bierger begrënnt. Firwat ginn d'Bréiwer dann net och op Spuenesch, Italieenesch asw. verschéckt? Wëll d'Madamm Gesondheitsminister domat ausdrécken, datt eis portugisesch Matbierger sech am Géigesaz zu anere mat deenen dräi Sproochen Däitsch, Englesch a Franséisch besonnesch schwéier dinn? Leien der Regierung Zuele vir, wéi vill Leit zu Lëtzebuerg just Portugisesch schwätzen?**

D'Äntwert vun der Madamm Ministesch fir Gesondheet a sozial Sécherheet ënnersträicht de Respekt vun der Regierung vis-à-vis vun alle Communautéiten, déi zu Lëtzebuerg wunnen. De Recours op verschidde Sproochen an der institutioneller Kommunikatioun entsprécht dem Prinzip vun der Méisproochegkeet, wat e wichtege Bestanddeel vum Zesummeliewen an eiser Gesellschaft duerstellt, an eng méiglechst breet Erreechbarkeet vun de Bierger garantéiere soll.

- 5. Steet déi Äntwert net am Widdersproch zu der Ausso vun der Regierung, datt sou vill Lëtzebuergesch geschwat géif, wéi nach ni?**

Déi selwecht Äntwert verweist och op d'méisproocheg Kompetenz vun eise Matbiergerinnen a Matbierger. Et besteet kee Widdersproch tëscht "Lëtzebuergesch schwätzen" a "Méisproochegkeet". Béd gi bei eis Hand an Hand.

- 6. Gesäit d'Regierung am Benotze vun net administrative Sprooche bäi gläichzäitegem Verzicht op d'Lëtzebuergesch net eng seriö Benodeelegung vun de Lëtzebuenger an der Lëtzebuenger Sprooch? Wéi verdréit déi Praxis sech mat eiser Legislatioun iwwert d'Diskriminatiounsverbuert?**

Wéi ewell an der Äntwert op déi Zweet Fro bemierkt ginn ass, wëllt d'Regierung eng allgemeng Uwendung vun der Lëtzebuenger Sprooch upeilen.

Dëst verhënnert net gezielt a punktuell och aner, sief et net administrativ Sproochen, wa néideg ze gebrauchen wann den Interêt et hiergëtt.

Lëtzebuerg, den 22. Mee 2026

De Premierminister,

(s.) Luc FRIEDEN